


Reyaksiyon



Firat Cewerî

Kî hindik bin, kî bindest bin, mafên kê bihêne bînpêkirin, ew serî hildidin. Bi serîhildanê re xwe yê qencîr, bi esiltir û bîngehtir dibînin. Gava em behsa zaravayên kurdî dikin, em bi taybetî behsa sê zaravayên serekî; kurmançî, soranî û zazakî dikin. Ji ber ku îro desthilatdarî di destên kurmanç û soranan de ye, ji aliyê nifûsê ji zazayan bêtir in û her weha zaravayên wan jî nêzîktirî hev in, loma gelek caran zaza mîna zarokên dêmariyê ji derve dimînin. Di civîn, semîner û konferansan de zaravayên kurmançî û soranî dihên bikaranîn, di kanalên televizyonan de wek zimanê nûçeyan ev herdu zarava hene. Zaravayê zazakî û heta cihekî yên ku bi zaravayê zazakî dipeyivin dîskrîmîne dibin. Loma, mirov gelek caran ji zazayan dibihîze ku koka kurdan zaza bûye, zaravayê zazakî ji zaravayên kurdî yên din bêtir nêzîktirî zimanê Îraniya kevin bûye û hejmara gotinên hevbeş yên di zazakî û zimanê avestayî de ji yên zaravayên din bêtir in. Bêguman zazayên ku xwe kurd nahesibînin ne tê de, lê gelek ji yên din xwe kok û bîngeha kurdayetiyê dibînin. Dibe wilo be, lê ya gelek kesan reaksiyon e û her weha dibe reaksiyoneke di cih de be jî.

Mirov eynî reaksiyonê li ba kurdên êzîdî jî dibîne. Îro, li gora statîstîkên ne fermî ji % 5ê kurdan êzîdî ne. Lê em dizanin, di destpêkê de ne wilo bûye, hejmareke mezin ji kurdan êzîdî bûne. Di pêvajoya dîrokê de, ji ber sebebên diyar wan dîn guhertine û loma her çûye êzîdî kêmtir bûne. Her weha em dizanin ku êzîdîyan di pêvajoya dîrokê de gelek tade û neheqî dîtine. Ew bêsebeb hatine

kuştin, ji ber baweriyên xwe ji cih û warên xwe hatine bidûrxistin; heta di hindek demên dîrokê de û li hindek deveran ne wek mirovan hatine dîtîn. Vê tevger û helwesta mirovên ne êzîdî kirine ku êzîdî xwe bikişînin qalikên xwe, xwe îzole bikin û nikaribin fikra xwe eşkere bibêjin. Loma, ew ji civatê bi dût ketine û baweriyaya wan nema bi civatê hatiye. Lê wan jî xwe ji baweriyên mîtolojîk rizgar nekirine û loma baweriyaya wan jî bi civatê ecêb hatiye. Gava ew mafê gotinê bi dest dixin, li xwe hayê dibin û xwe bi êzîdîbûna xwe serbilind dibînin, hingî dikarin hemû kurdên misilman bidin ber xwe, bibêjin ew di riya şaş de ne, dîne kurdan yê destpêkê êzîdîtî bûye û loma kurdên ne êzîdî bin li ser riya şaş in, dijminê qewmê xwe ne. Ew xwe esil, bingeh û li ser riya rast dibînin. Yê din şaş û jirêderketî dihesibînin.

Heger em vê reaksiyonê ji dîn û zaravayên kurdî derbixin û hebekî gelemperî bikin, em ê bibînin ku ev li ba hemû kategoriyan ku dihên pelçiqandin, an jî ji wekhevîyê bêpar in, heye. Ev reaksiyona nivê ku dihê pelçiqandin e. Em dizanin ku jin nivê civatê ne, nivê nifûsa mirovan in. Jin hem nivê nifûsa mirovan in, hem jî nivê girîng in. Ya ku avis dibe û dizê, jin e. Ya ku jin û mêran dihîne dinyayê dîsa jin e. Ne ji jinê be jiyandixetî, berdewamî namîne. Lê li gel vê jî, di piraniya kultur û dînan de jin bindest in, jin kategoriyeke ji gelek mafên xwe bêpar in û her tim çu li ser serên wan hatine hejandin. Di gelek dînan de ew hatine ricimandin, di alaviyên êgir de hatine şewitandin, an jî bi kevîran hatine kuştin. Ew wek cinsê Şeytên hatine dîtîn û loma bindest hatine hiştin. Vêca gelek tevgerên femînîst yê ku li dût bidestxistina mafê jinan in, li hemberî mêran eniya şer vedikin û neyartiyê li hemberî mêran îlan dikin. Bi ya wan, hemû xerabî ji mêran dertê, di civatê de ew çavkaniyên hemû pîsîtiyan in. Ew dest davêjin jinan, tecawizî wan dikin, li wan dixin, nahêlin ew di pêlika jiyandixetî de gavekê ber bi jor ve bavêjin, ew di riya azadî û serbixwebûna wan de kelemên mezin in. Loma, jin ji mêran qenctir in û mêr benderuhên neqenc in. Bi ya hin tevgerên jinan divê mêr nemînin, koka wan bihê qelandin. Heta, hindek tevgerên femînîst ewqasî bi pêş de diçin ku, rasterast dibijên, hemû mêr ji cinsê heywên in.

Bala xwe bidin reaksiyona bejinkinan ya li hemberî bejindirêjan. Gelek ji bejinkinan ji bejindirêjan aciz in, ji jêr ve li wan dinêrin.

Bêguman yên bejindirêj jî yên kin pelçiqandine, ew bi gotinên wek “qama wî bihustek e”, “qama wî di nava gûyê wî de ye” her tim dîskrîmîne kirine. Loma, yên kin, ji bo baweriya xwe bi xwe bihînin û xwe xurt û qewîn hest bikin, an xebatên mezin kirine, an jî li dijî dirêjan gotinên reaksiyonel gotine. Pêşî xwe pesinandine, helbest û stiran avêtine ser xwe, gotin li ser xwe çêkirine, xwe di civatê de girîng dîtine. “Ez Xelef im, Xelef im, ez Xelefê kinik im, xwediyê şûrê bi şirik im...” yek ji nimûneya folklorê kurdî ya berbiçav e. Yanî kinik e, lê mêrxas e, li ber xwe dide, zora yê hemberî xwe dibe. An jî “zêr jî hûrik e” yanî yên kin wek zêr in, hûrik in, lê bi qîmet in. Li dijî dirêjan jî gotine: “Dirêj e, lê aqilê wî di conga wî de ye”. Yanî dirêj e, lê kêmaqil e, ya girîng ne dirêjbûn, lê aqil e.

Esmeran jî xwe li hemberî yên gewr parastine. Digel ku li welatê me hejmara esmeran zêde ye jî, lê li ba kurdan rasîzmeke navxweyî heye. Yên gewr û spî ji esmer û reşan biqîmettir in, xwe bi qîmettir dibînin. Bêguman kurd vê yekê ne wek rasîzmeke organîzekirî dikin, lê spontane dikin. Ew dikarin rasterast bidin rûyê mirov û esmertiya mirov di bîra mirov de bihînin. Yên ku di çavên spiyan de esmer û reşikên bêmirêz in, li ba esmeran dibin esmerên xwînsêrîn û xweşik. “Esmeran bi gewran nadim, esmer ji gewran çêtir in, xwiya wan şêrîntir in...” di bîra we hemûyan de ye. Esmer xwe bi gewran nadin, xwe ji wan şêrîntir û xweşiktir dihesibînin. Rengê gewran wek rengê miriyan bi lêv dikin.

Nimûneyên bi vî awayî yên siyasî, civakî, cografî, psîkolojî û hwd. gelek in, ez ê wê ji we re bihêlim û qîma xwe bi nimûneyên jor bihînim, da dirêjbûna nivîsa min jî nebe armanca reaksiyona we...

